

Na osnovu člana 71. i člana 125. Statuta Općine Vogošća ("Službene novine Kantona Sarajevo", broj: 27/14 - Prečišćeni tekst i broj: 14/15), općinski Načelnik donosi:

P R A V I L N I K O RASPODJELI NOVČANIH SREDSTAVA ZA SUFINANSIRANJE LIJEČENJA OSOBA OBOLJELIH OD RIJETKIH ILI TEŠKIH BOLESTI

Član 1.

Pravilnikom o raspodjeli novčanih sredstava za sufinansiranje liječenja osoba oboljelih od rijetkih ili teških bolesti u daljem tekstu (Pravilnik) utvrđuju se kriteriji i način dodjele novčane pomoći osobama oboljelim od rijetkih ili teških bolesti, čije je prebivalište/boravište na području općine Vogošća.

Član 2.

Cilj dodjele novčane pomoći u smislu Pravilnika predstavlja pomoć pri realizaciji troškova liječenja oboljelih od rijetkih ili teških bolesti, a koje iziskuje veća novčana sredstva.

Član 3.

Finansijska sredstva utvrđena na ekonomskom kodu 614239 - grant sredstva za sufinansiranje liječenja rijetkih bolesti, raspoređuje općinski Načelnik zaključkom na prijedlog Službe za boračko-invalidsku i socijalnu zaštitu Općine Vogošća (u daljem tekstu Služba) u skladu sa utvrđenim kriterijima, a na osnovu podnesenih zahtjeva putem protokola Općine Vogošća.

Član 4.

Osobe oboljele od rijetkih ili teških bolesti mogu ostvariti pravo na sufinansiranje troškova liječenja u smislu Pravilnika pod sljedećim uslovima:

- a) Dokaz da su oboljeli od rijetke ili teške bolesti (medicinska dokumentacija);
- b) Dokaz o potrebi liječenja osobe u BiH ili van teritorija BiH, koji zahtjeva veća novčana sredstva.

Član 5.

Postupak za ostvarivanje prava

- 1) Zahtjev za dodjelu novčane pomoći po Pravilniku podnosi se Službi za boračko-invalidsku i socijalnu zaštitu putem Centra za pružanje usluga građanima Općine Vogošća na propisanom obrascu, a uz koji se takođe predaje odgovarajuća medicinska dokumentacija kojom se potvrđuje da lice boluje od rijetke ili teške bolesti.
- 2) Podnesene zahtjeve po potrebi razmatra Komisija, a koju imenuje Općinski načelnik.
- 3) Komisija se sastoji od predsjednika i dva člana, od kojih je Predsjednik komisije socijalni radnik nadležne Službe, a članovi diplomirani pravnik nadležne Službe i socijalni radnik OJ Dom zdravlja Vogošća.

Član 6.

Podnosiocu zahtjeva može se odobriti novčana pomoć za sufinansiranje troškova liječenja osobama oboljelim od rijetkih ili teških bolesti samo jednom u toku budžetske godine.

Član 7.

Lica koja ostvare pravo na novčanu pomoć za sufinansiranje liječenja osoba oboljelih od rijetkih ili teških bolesti putem Službe za boračko-invalidsku i socijalnu zaštitu u skladu sa odredbama ovog Pravilnika ne mogu ostvariti pravo na jednokratnu novčanu pomoć utvrđenu Odlukom, odnosno Pravilnikom Općine Vogošća o odobravanju i isplati jednokratne novčane pomoći licima u stanju socijalne potrebe, kao i novčanu pomoć za liječenje ratnih vojnih invalida i članova njihovih porodica, članova šehida i poginulih branilaca i demobiliziranih boraca – branioca utvrđenu Pravilnikom Općine Vogošća, osim u izuzetnim slučajevima na osnovu procjene komisije.

Član 8.

Jednokratna novčana pomoć će se dodjeljivati u visini do 1000,00 (hiljada) KM u skladu sa Budžetom, odnosno objezbjeđenim finansijskim sredstvima za tekuću godinu.

Član 9.

Podneseni zahtjev važi samo za budžetsku godinu u kojoj je podniet.

Član 10.

Stupanjem na snagu ovog Pravilnika, prestaje da važi Pravilnik o raspodjeli novčanih sredstava za dodjelu jednokratne novčane pomoći porodiljama sa područja općine Vogošća, broj: 09/1-35-341/18 od 09.02.2018.godine.

Član 11.

Izmjene i dopune ovog Pravilnika vršit će se na način i po postupku koji važi za njegovo donošenje.

Član 12.

Ovaj pravilnik stupa na snagu narednog dana od dana objavljivanja na oglasnoj ploči Općine Vogošća, a primjenjivati će se od 01.01.2019.godine.

Broj: 09/1-35-189/19

Datum: 28.01.2019. godine

